

太清中黃真經釋題

中黃經亦曰胎藏論胎藏論者九仙君黃真人所集也真人常觀察元炁浩然凝結成質育之以五藏法五行以相應明之以七竅象七曜以昭晰其識潛萌其神布行安魂帶魄神足而生形神相託神形相成口受外味以忘識身受內役以喪精神離形以散壞形離神以去生殊不知皮肉相應筋骨乃成肝合筋其外爪心合脉其外色脾合肉其外唇肺合皮其外毛腎合骨其外髮鹹傷筋苦傷骨甘傷肉辛傷氣酸傷血故聖人曰先除慾以養精後禁食以存命是知食胎炁飲靈元不死之道返童還年此蓋聖人之所重也且夫一士專志下學而上達一夫有

道藏輯要

中黃真經

六

尾集一

心覩天道之不遠學而無至謂之愚不學不知謂之蒙然三蟲未去心踐荆榛之田當三蟲已亡自達華胥之國顯彰雲路備述胎仙知聖行之根源辯仙官之尊位至於霞衣羽服玉館天廚蓋爲志士顯聊泄天戒非人妄告殃爾明徵密此聖門必登雲路慎無傳於淺學誓莫示於斯文慢而折神輕言損壽若非志士無得顯言總一十八章列成一卷號曰胎藏中黃經皆以篇目相銜文句相繼義精於成道言盡於養生行顯意直事具文切食炁之理備載歸天之道悉成援筆錄章列篇於後